



焦太史編輯國朝獻徵錄卷之一百十目錄

都司

花茂

瞿能

謝貴

楚智

卜萬

馬宣

莊得

彭二

彭聚

孫太

朱鑑

張皂旗

唐禮

楊松

張信

王清

許寧

張世忠

李任

韓青

周英

白弘

宗禮

左君彌

余斌

陳儀

江洪

趙本

韓斌

張鵬霄

王邦直

張建節

四明趙昌期

校

目錄終

吳興茅元儀

錢塘徐象標刊

焦太史編輯國朝獻徵錄卷之一百十

都司

都指揮使花公茂傳

花茂巢縣人元季起兵從陳世光歲丙申三月歸附
 癸卯援安豐敗張士誠兵又于鄱陽湖戰滅陳友諒
 甲辰平武昌授威武衛百戶累以功多洪武八年十
 月陞神策衛指揮僉事十三年調廣州左衛勦平陽
 春等縣叛賊十四年收捕清遠英德翁源博羅諸縣
 山寨十五年討海南叛蠻出海捕倭十九年東筦龍
 川興寧南海香山翁源民作亂統兵討平之二十年

正月陞廣東都司指揮同知夷電白等賊二十一年
破歸善等縣賊寨二十二年四月陞本司都指揮僉
事五月陞都指揮同知賜誥子孫世襲廣州左衛指
揮使是年擊南海香山黃連等寨二十四年七月收
勦連州廣西湖廣等處徭賊三萬餘語在事紀二十
六年正月致仕 上命其子爲東勝右衛指揮僉事
茂仍蒞事四月統軍蕩滅東筦筭岡等處二十七年
茂上言請徙廣東沿海地方東筦香山等縣逋逃蛋
戶爲兵又奏添設沿海依山廣海碣石神電等衛所
二十四處築城濬池收集海島隱料無藉等軍仍於

要害山口海議立堡撥軍屯守詔皆從之二十八年
閏九月征捕海南等處山峒黎賊明年二月入覲
上慰獎之且曰爾回令次子英來朝 朕將用之六
月茂回會番禺後山等寨賊叛命英同肇慶衛指揮
夏忠領軍捕之獲其首從鄧佛蔭等七十五人卽遣
英赴京十一月茂在任奉制陞本司都指揮使三十
年正月 上命英爲廣東都指揮僉事與張春共殄
賊首黃黑面等地方靖寧四月二十日茂卒賜葬牛
首山安德門外廣人祠之于粵秀山英武毅有父風
自以軍功陞本司都指揮使永樂中累建大勲後致

仕

副總兵都指揮使瞿能

忠節錄

瞿能不知何許人驍勇有名洪武中以四川都指揮使與同知徐凱統兵從涼國公藍玉渡大渡河擊西番有功又與都督徐司馬爲副總兵從都督聶緯討建昌叛酋月魯帖木兒又副藍玉破賊雙狼塞建文君卽位從李景隆爲裨將攻北平能力戰勢甚銳與其子帥精騎千餘殺入張掖門景隆忌之不令速進以故北平得爲備白溝河之戰能奮勇衝擊殺傷甚衆北平兵遂却渡河能及其子與北將房寬接戰寬敗文皇馬阻于隄幾爲能所及得高煦兵令又會

大風起南師陣動諸將皆狼狽走獨能父子力戰死
之精兵萬餘人皆沒無一還者

北平都指揮使謝貴

忠節錄

謝貴未詳始所自起洪武二十五年以錦衣指揮僉
事陞河南都指揮僉事署山西行都司事二十八年
坐趙隆事法當死 太祖宥之降河南衛指揮僉事
建文君卽位慮北平有變兵部尙書齊泰薦貴智勇
以爲北平都指揮使俾覘燕動靜令其練兵卽有事
先發後聞已卯六月貴部署七衛兵布城中迫王城
外墻以木柵斷端禮四門 文皇命指揮張玉朱能
等帥護衛勇士爲之備能請先擒謝貴張昺 文皇
曰彼防守旣嚴猝亦難擒須以計致之今姦臣遣中

人來逮護衛官屬宜悉依所坐名收之就令中人名
貴昂付所逮者則貴昂必來來則縛之一夫力耳乃
匿壯士端禮門內遣召貴昂久之乃至衛從甚衆門
者叱止之惟貴昂得入至端禮門壯士出擒之將士
移時乃知皆散走玉等率勇士捕之是夜攻九門已
克其入惟西直門未下指揮唐雲單騎諭守者散乃
盡克九門于是上書清君側之惡而靖難之兵起矣
貴等卽日被害

北平都指揮使楚智

忠節錄

楚智不知何許人洪武中稱驍將數出塞有功歷陞
都指揮使建文初守北平尋召還從李景隆統騎兵
遇北師輒奮力戰夾河之役死于陣

大寧守將卜萬

忠節錄

卜萬未詳所自建文時爲大寧守將謀勇自負每戰輒先登靖難兵畏之部將陳亨欲降畏萬不敢發文皇乃行反間貽萬書盛稱獎萬極詆毀亨緘識牢密召所獲大寧卒解縛厚賞之置書衣中俾歸密與萬故使同獲卒見之怪問守者曰彼何爲得此守者曰遺歸通密書於卜都司以故得厚賞卒跪告守者曰能爲我請得借行惟命是從不敢望賞守者爲請遂俱遣而竟不與賞不得賞者終不平至卽發其事劉貞陳亨搜卒衣得與萬書遂執萬下獄死籍其家

未幾亨竟降貞遁遼東大寧相繼不守矣

守薊州都指揮馬宣

附鎮撫曾濬

忠節錄

馬宣不知何許人建文初爲都指揮守薊州靖難師起宣謀起兵迎拒已而張玉朱能來戰宣與鎮撫曾濬閉城堅守文皇遣將反復諭之不下玉擁衆急攻宣率衆出戰玉遣精銳衝入其陣宣戰沒濬亦死之或云宣被執罵不絕口死

西涼都指揮莊得

一作德

忠節錄

莊得洪武末爲西涼都指揮召至北平爲燕兵右翼
出塞有功建文初隸宋忠麾下懷來之戰惟得一軍
獨全後歷城侯盛庸與北師戰于夾河得奮力助庸
斬大將譚淵已而北師以勁騎乘暮掩擊得力戰而
死

北平都指揮彭二

忠節錄

彭二亦未詳始所自起建文時爲北平都指揮有威名靖難兵起殺謝貴彭二咤曰早不爲我謀急躍馬大呼市中集兵得千餘人欲直入端禮門文皇遣健卒格殺之兵亦散

北平都指揮彭聚

忠節錄

彭聚北平都指揮也與孫太副宋忠守懷來忠敗聚力戰死當是時諸將校爲靖難兵所俘者百餘人皆不肯降以死大半不可考矣

北平都指揮孫太

忠節錄

孫大都指揮從宋忠戰懷來先登頗有斬獲靖難兵
擇善射者並射太中矢流血被甲慷慨裹血力戰奮
呼陷陣死之

行都司都指揮朱鑑

忠節錄

朱鑑北平行都司都指揮守大寧北兵至大寧諸將
陳亨房寬皆降鑑力戰不支被縛罵不絕口死之建
文君加卹典 文皇檄中所謂萬段凌遲處死者卽
鑑也

都指揮張皂旗

忠節錄

張皂旗者逸其名不知何許人建文時以都指揮充
偏將力能挽千斤每遇北兵輒揮皂旗先登軍中呼
爲皂旗張轉戰山東屢有俘馘至夾河力戰死猶執
皂旗不仆北軍皆異之

都指揮唐禮

忠節錄

唐禮歷官都指揮靖難兵起盛將軍以徐凱敗于滄洲引兵出德州營于東昌禮素稱戰將令將騎兵殿後而以孫霖為先鋒營滑口靖難兵夜襲破之擒禮霖遁走

都指揮楊松

忠節錄

楊松不知何許人積功官都指揮北兵南狗耿炳文
使松爲先鋒據雄縣北兵圍雄松令軍士登城大罵
北兵益憤破城執松不屈死之

驃騎將軍都指揮使張公信傳 朱睦㮮

公信字彥實輔從兄也洪武三十二年舉鄉試第一永樂初拜禮科給事中尋遷刑科都給事中九年擢工部右侍郎會河決壞民田廬上遣信來視信乃繪圖馳奏曰臣訪得祥符魚王口至中灤二十餘里有舊河岸與今河岸平浚而通之俾循故道則水勢可殺詔從之發河南民夫十萬相度濬治工竣信還京時昭皇監國遣人勞視居頃之浙江守臣奏江塘潮決昭皇復使信往治不數月修築如故洪熙初轉兵部左侍郎賜齋金綺甚腆輔以信爲同族

奏乞改授武階以是調懷遠將軍錦衣衛指揮同知
尋擢昭勇將軍本衛指揮使宣德改元都督蔡福叛
交趾命信帥兵往勦事寧擢四川都指揮僉事未幾
進驃騎將軍都指揮使在蜀十五年紀律嚴整羗夷
莫之敢犯正統十年六月卒于官年七十一歲 上
賜祭仍命有司歸葬祥符縣東之白塔原

論曰余嘗過汴之東郊謁驃騎祠墓已荒廢鞠爲茂
草徘徊瞻眺未嘗不愴然而悲也因憶少時聞驃騎
爲諫議封駁糾彈無所顧忌貴戚爲之斂跡及命半
交鎮蜀而又勲庸著傳曰有文事者必有武備驃騎其庶幾乎

廣東都指揮使王公清傳

王清字一寧合肥人世以武功爲濟寧衛指揮慷慨
多勇畧常提兵入衛宣德間率所部出喜峯口及至
鴛鴦海覘虜累立奇功正統二年陞廣東都指揮以
親老不遂迎養陳情乞分俸于原衛詔許之蠻夷叛
據大藤峽清往討有功戊辰總督廣東軍務已巳協
同總兵駐軍高州廣賊黃蕭養劫鄉民叛衆十餘萬
圍攻廣州清帥舟師赴援至沙角尾水淺舟膠失利
被執賊素知清威望不敢害清投水不死因寄衣還
廣城中大書一詩兩捧 天書鎮百蠻偶因兵敗不

生還飄零身世輕于葉磊落襟懷重似山半夜愁吟
珠海寺幾回夢墮鬼門關憑君獨有衣相寄爲我招
魂宇宙間數日賊擁清至城下使諭衆開門降清罵
不絕口遂遇害朝廷憫之加子爵二級清善律詩所
著有建案集行於世

羽林左衛帶俸署都指揮使許寧傳

羽林左衛帶俸署都指揮使許寧字志道直隸江都
縣人正統末以禦虜功由舍人陞至錦衣衛正千戶
已而襲父職爲羽林左衛指揮使以薦陞署都指揮
僉事守禦柴溝堡成化初充大同遊擊將軍累立戰
功陞署都指揮同知六年陞都督僉事充總兵官鎮
守延綏十八年陞都督同知仍充總兵官鎮守大同
時虜衆入寇與鏖戰二日一夜虜解去降勅獎諭二
十年以下米莊之敗降羽林左衛指揮同知閑住弘
治五年以言者交薦陞署都指揮使坐營管操未幾

肅復錄 卷之二十一
卒時弘治十一年十二月贈都督僉事寧自束髮行陣凡經一百十九戰被二十七鎗麾下知名士若劉寧神英李杲等十餘人性沉毅自負甚重不屑進取一時稱邊將者殆莫能過大同之役寧知虜勢方熾欲持重以俟動而代王督趨甚急至使衆哭於轅門寧憤激以出遂至於敗議者惜之子泰試武舉第一

參將張世忠傳

永平志

張世忠字顯甫先山東日照人宣德間祖俊由臨洮衛鎮撫調衛始爲山海人俊三傳無嗣以猶子鳳襲世忠其子也生而神爽志向不凡少長入衛學慕詹公榮文藝就正之通兵法而兼文藝嘉靖丙戌中會試武舉贊畫軍機於薊戍子襲祖職加武舉二級授署指揮僉事撫臣薦管衛印編徭爲後法薦授提調石門進守備黃花鎮革中璫斂役諸弊進署都指揮右叅將分守大同中路振揚士氣虜不敢輕犯民遠山耕獲復請加衛學廩糧科貢額頓加舊項調應援

宣寧斬獲虜級二十九顆馬駝牛羊八百有奇夷器二千五百餘陞實級賚金幣續給誥命兼節獲捷奏大臣奏保因邊事回籍對簿旋以西寇棘兵部請授偏頭叅將是時太原失利人咸不樂此世忠聞命奮然曰正報國之秋也亟赴之虜寇太原矣世忠所部軍士先期選策應止存千餘而統之與叅將劉維琥大同副總兵段堂叅將何堂遊擊張文懿從寧武關合營追賊軟血誓相救援乃結隊自侯林西行追至祁縣六支村西遇虜衆督率力戰虜見其軍士壯戰又力呼騎三千餘合圍四將縮閉營世忠督戰益力

賊亦窘會矢火藥盡世忠憤呼曰我軍被圍諸將背盟竟不相援國憲天刑寧汝追耶復督短兵血戰自巳至酉賊見我兵死傷衆無援久戰力竭遂躡我營馬爲射死世忠頭中二矢又騎墻獨射被穿袖一箭而死家丁五人往救張臣及百戶張宣俱卽死而士馬亡過半矣嘉靖壬寅七月九日也 上嗟嘆曰醜虜猖獗世忠孤軍奮勇死戰殞身報國忠義可尚先贈右都督賞百五十兩宣及臣各四十兩爲棺殮資兵部議奏與世忠同死鋒鏑士先給家屬五兩爲棺斂資以後不分主客官兵但陣亡者如之庶死者如

生生者效死制可且曰世忠忠蓋非常并宣臣卹典
亟議之山西撫臣劉臬按臣童漢臣請重獎卹順天
撫臣侯倫稱世忠原籍山海衛人自陞叅將路由遵
化臣見貌不及衆人初不以禮待及與之坐凜然有
忠義氣今果死節其死非偶然也山西爲死事之所
山海乃生長之鄉宜俱建一祠以酬其忠兵部議如
之請祭六壇爲造墳及賜謚其宣臣無祭例但以死
勤事者宜與祭一壇工部量與營葬其子孫典雖陞
級而身橫罹鋒鏑其情狀尤可憫議與祭一壇以後
不分主客兵但陣亡者如之庶足慰九泉忠魂作三
軍勇氣制可賜祭葬用一品禮謚忠愍祠額曰勸義
而宣臣及軍士如議爲例蓋因其勇烈格主受特
典而廣錫類及於後死者永永時縉紳陵夷武弁久
矣山西撫按三司莫章隆重而激勵以媿諸將不援
者永平鄉士夫闔境無遐邇束芻而弔山海榮等設
位於鄉賢祠哭盡哀雖痛愍乎死事亦其生平事親
孝聞父喪於大同哀毀踰禮爲制限不得躬襄事雖
甲冑從戎退輒衰服慘容抱恨痛終三年母念少子
將順靡不至而閨門嚴肅善與人交故鄉議重之也

遼東都司都指揮同知李任傳

李任金華永康人洪武中襲父爵爲燕山右衛指揮僉事從太宗皇帝起兵靖難以功累陞遼東都司都指揮同知鎮守彰德宣德元年從征叛賊黎利守昌江賊旣獲都督蔡福逼令福至昌江城下呼任等速降任於城上罵福曰汝爲大臣不能殺賊反爲賊用狗彘不若用銃擊之賊懼擁福去賊以昌江爲官軍出入咽喉之地大集兵象用烏龜筓呂公車雲梯來攻任與顧福等留老幼婦女守城率精銳出擊賊燒其攻具賊又築壘射城中任福夜出襲破賊營賊

掘地洞欲潛入城任開橫溝用將軍石擊之入者輒
死城中士卒初有二千餘人前後三十餘戰至是死
亡過半賊益兵象攻圍日急相拒凡九閱月人力疲
困芻糧匱乏而賊益衆以雲梯登城奪其門任福率
死士三戰三敗之賊擁象益兵而入任與福不能支
皆自刎死時宣德三年五月也內官馮智指揮劉順
知府劉子輔俱自縊死城中軍民婦女不受屈辱自
死者數千人

鎮國將軍山東都指揮同知韓公青墓碑

許彬

天地有大經亘萬世而不泯者忠義之氣是也是氣
在人履垣途爲忠義之士遇患難則爲死節之臣存
亡雖不同所以爲天地大經萬世不泯者固忠義之
所存而浩然之氣爲之主也若鎮國將軍山東都指
揮同知韓公青者其所爲抱負忠義而浩然之氣爲
之主者歟公世家滁之全椒上世以來代有顯者洪
武中大父春從文皇渡江以功累陞副千戶旣沒父
貴襲陞正千戶守北平攻取懷來雄縣大戰鄭村埧

陞指揮僉事進指揮同知征大同白溝河陞指揮使
再陞都指揮僉事攻奪九門進指揮同知小河之戰
死於敵公以有孩提叔友偕襲指揮使尋以公成立
還其官公英勇過人且善騎射永樂中 文皇征迤
北聞公名特命率邏騎爲前鋒攻殺醜虜賊衆宵遁
閱數日師駐大城陽和復命公率勁騎襲擊之賊望
風奔命不暇宣德改元從 宣廟討武定州旣還賜
賚有加明年甘延諸羌侵邊命總戎征之舉公輔行
公才識敏給能飭邊備嚴號令訓練簡閱有古良將
風旣還陞山東都指揮僉事公操執清慎門無私謁

暇則與賢士大夫講論古今及將鑑武經諸書以咨
聞見嘗駐節臨清總督江淮漕運將士不勞而事集
以故再遷今官正統十四年秋虜酋也先輩背逆天
道憑陵中國 太上皇帝親御萬乘逆擊塞外爲權
奸所誤遂致蒙塵賊乘勝長驅履險隘如坦途 今
上皇帝詔凡邊關可通萬馬者悉以重臣守之紫荆
關尤甚重推公往守而以副御史孫祥爲監軍公倉
卒至關關寬敞多岐路守者素不爲備虜衆猝至乘
虛而入不絕我軍至者才什之一衆寡不敵惶惑奔
潰公揮旗招之得勁騎百餘諭以忠義當盡死報國

衆聞之感泣公縱騎突出與賊交戰於升兒灣擊賊
數輩已而賊悉衆來迎公每手劍之數被創復爲流
矢所中公屹然不動自午達申轉戰益力賊圍之數
重欲招公降公大罵曰臊羯狗奴我背忠義而徇汝
乎乃引刀自刎實正統十四年十月十有二日也賊
退之三日收公屍身無完膚顏面如生聞莫不洒泣
風紀近臣有交章言公戰死可憫乞加恩典者上
命陞三級以其子承嗣幼弱命給廩優養於家嗚呼
公承先世之美能自奮立振揚威武以成厥功而中
罹艱危以身殉國可謂見危授命者矣然則公雖死

而名聞長存若張巡死睢陽余闕死安慶忠義之

至今在人所謂天地大經萬世不泯者得不與同一
輒哉前此廣東海寇猖獗擁衆臨城主將張安旣失

利而裨將都指揮王清力戰移日身被重創矢石如

雨左右皆憚不敢近清身憊計窮爲其所執賊素畏

清給以甘言推爲上將否則必誅清罵賊不絕聲又

置之檻車不能死日令人誘之清終不聽惟求一死

翌日就戮清曰汝輩繫我城下呼三司官臨視使知

吾死所賊如其言至是遇害古人謂慷慨殺身易從

容就死難噫若清可謂無忝于公無媿于古名將矣

死所
硬知

清傳
中未
及于
此發

彼有倒戈迎降開門輸款者而又苟延殘喘以圖爵
賞視二公所處不亦頗厚矣乎公死之四年鎮臯蘭
都帥李進之子文素與公厚恒以承嗣弱幼公之忠
義不自於世憤然於懷比以公務來京乃狀其行實
詣途徵銘將過歷山葬公刻石墓道以彰公之潛德
後之欲知公者當於此焉求之

都指揮同知贈後軍都督府都督僉事周公

神道碑

馬中錫

陝西總戎都督僉事周君璽成化中嘗分守陽和厥
考都指揮公就養以終葬旣數年弘治庚戌歲中錫
提學於陝君自持狀泣請銘墓碑按狀公諱英字用
傑其先永平遷安人勝國時有官至右丞者祖亨國
初率其家百口來歸朝議嘉之授燕山護衛指揮賜
田宅東安縣故爲東安人父斌永樂初以靖難功讓
其兄或授都督賜蟒衣復還遷安故又爲遷安人生
公及二季某某教以力田讀書於聲利澹如也及漢

庶人有罪公以漢國連姻註誤與父同下獄父竟死
獄中公謫戍萬全開平衛時都督楊洪以遊擊將軍
禦邊公隸其麾下見奇之委長騎隊未幾虜寇邊
令公襲擊出境至瓦房嵯馳入敵壘得生虜脫脫白
及驅其駝馬而還正統三年與虜遇人伯顏山麓連
陷其陣擒其酋長也陵台俘獲資械甚衆明年至黑
松林斬捕首虜過當奏功陞副千戶八年擊虜過把
禿河獲其酋那反有文綺官鏹之賜九年勅出陝西
至應昌別兒克之地與虜鏖戰一晝夜生擒平章少
台斬首四十餘人其所掠男女牛羊五千以歸陞

正千戶十二年出開平至以克蘇遇虜大戰矢下如
雨人突入其陣獲虜達刺孩等男婦檻送京師十四
年虜大入寇英宗親率六軍待邊時都督洪進爵
昌平伯授節鎮宣府以公隸都督楊能護蹕至大同
與虜遇於栲栳山公擒生虜則不丁者以獻命誅馮
牙旣又從右叅將江廣擊虜至乾庄兒堡斬首虜猛
禿兒麻等還奏捷行在土木失利公身被重創力戰
得脫天子北狩京師戒嚴景皇帝以郕王監國
徵洪兵勤王公亦褻創赴難至京師洪進爵爲侯因
面陳公謀勇可任且賞未當功遂陞指揮僉事後從

洪禦紫荆諸關與虜連戰彌月因大敗其衆生擒酋
虜阿歸等復斬首百餘級僞太師也先乃率衆北遁
明年改元景泰陞指揮同知二年修前乾庄兒等處
戰功陞指揮使其年洪卒一軍盡還宣府獨公被旨
留京師註府軍前衛天順改元 英廟復辟都督能
以進爵武強伯奏公栲栳山擒虜馮牙之功未賞陞
都指揮僉事五年又以平逆臣曹欽功陞都指揮同
知六年公年漸老盡以其橐鞬戈甲付璽曰汝繼吾
志璽奉命惟謹襲府軍前衛指揮使累官後軍都督
僉事贈公如其官母李氏贈夫人嗚呼世人視友於
之愛如土苴弦誦者不免也公父讓爵一節旣無媿
子臧季扎之義卒寃抑以死公遂能挺身萬死之中
策勛百戰之後則天之報公者不誣耳余未及識公
而屢見公之子議論亶亶好文愛士卽古所謂儒將
不能遠過則得于公者不淺古稱世祿之家鮮克由
禮公家膺厚祿百餘年而魚魚雅雅乃若此豈可以
例類之哉

浙江都指揮同知白君弘墓志銘 邵寶

君姓白氏諱弘字宗大別號松庵其先出元部落有把思台者以功受王封國初有士願者始受籍永平之昌黎君曾祖也君祖誠從文皇靖難有功後再
以克虜功累陞永平衛指揮使君父廷玉襲嘗推總三千營事俱贈如君官母蘇氏封太夫人蘇氏娠君有夢祥旣而君生器宇果異六歲讀書日記數百言與羣兒嬉有一誤墮溝中者衆奔去公獨垂繩援焉十三能屬文選補武學生從翰林劉先生戩受易學三應科舉更習書經司馬余公子俊保國朱公永臨

試弓馬策畧屢優獎之時京營候叅帥者若干人君爲之首弘治戊申始開武舉君舉第二陞署都指揮同知贊畫方畧於大總兵所加俸三石未幾實授癸丑冬有舉君久諳戍務者以前官總理神機營事司馬馬公文升一見稱材且以久滯爲惜尋銓今官理軍政兼屯田清軍馬政諸務庚申歲總漕都憲張公敷華以君廉勇協望舉總浙漕君疏八事上備朝議多見施行居二年鎮巡會推邊帥疏上君名奉勅總督海道今都憲洪公遠時以憲副與君同事葺城于圯浚濠于淤抑強警惰以御守卒先是有屋於海島者往往招釁而私鹽竈燒疑於烽火君悉去之他所施罷皆當利弊又以餘力設師塾以訓武胄居歲餘海道寧肅正德改元以上登極恩使來致白金及金獅緋衣之賜明年兵部以荆楚地重乃移君掌湖廣都司事君鎮以簡靜南人懷之巡按御史李君天賦嘗以堪大將舉是歲三法司奉勅蒞獄于藩有議死而稱寃者君得其情正色言之不少畏却得釋者二百餘人又明年君以疾請於巡撫都御史陳公鎬乃檄還君於浙越三年江西盜侵衢州鎮巡謂公練達委以疆事君極力備禦未幾輿疾還卒是爲癸酉

虞衡錄 卷之二十一
六月四日享年六十有五君雅好吟咏與客倡和動
成卷帙有松庵集藏于家

佐擊將軍贈都督同知諡忠壯清渠宗公禮傳

澹園集

嘉靖中島夷內訌沿海處亡所不蹂躪時久不見兵
革而閩浙直姦人陰內主之與相勾連亂益甚迨甲
寅乙卯間嘉湖蘇松之禍棘矣 天子震怒有所誅
逮不任事者特建大將旗鼓責以驅逐掃蕩而選諸
偏將軍佐之樞臣論薦公勇武饒材畧令統所部民
兵千詣浙直軍門聽調遣爲應援計寔乙卯之十一
月也公聞命慨然曰古以馬革裹尸自誓者豈異人
任哉此行所不能自効寬上南顧憂者非夫也卽日

兼程行所至秋毫無犯丙辰正月抵松江黃浦聞制
府命止營禦新塲賊時新塲賊約千五六百人漳潮
寧紹爲賊翼者若土人入倭爲鄉導者不下三千餘
人皆兇狡而被虜供其使令者又二千餘人於是新
塲百里間皆賊藪眈眈虎視公數奮兵過浦挑戰有
金娘子橋八師庄下沙諸處賊先後被創堅守不敢
出至三月二十三日探柘林新城堡新倭二百餘登
岸縱掠公提兵掩擊賊奔潰次日追至劉津村又新
倭二千餘擁衆來公復提兵掩擊賊又奔潰會新塲
舊賊與新至者合猝與我兵遇公分騎兵百爲兩
用箭圍射當獲十數人又次日乘勝攻破新塲賊巢
賊大慟倉皇奔新船遞去旋奪回被虜婦女六百餘
口而新塲諸穴悉平前是以南人柔脆不任戰倭益
張公婁剡之聞者相顧愕眙以爲神四月總督胡公
檄公隨賊所向追勦之連有吳江嘉興之勝十九日
兵至崇德縣探倭至皂林勢且犯杭公兵遄往皂林
迤西石橋止營禦之二十三日倭萬餘夾河來戰公
統兵不滿九百人自寅至辰所殺傷多賊敗去頃之
復來戰自辰至巳又自午至申賊番休來攻三戰三
北死傷無算軍大振會石橋前鋒中賊砲橋失守公

被重傷猶果創奮臂戰徒以九百當萬人衆寡遠不敵兼盡日乏食軍無後救者公力竭仰天疾呼曰死當滅賊以報國遂遇害乃是日之暮也總督聞其事於朝 肅皇帝亟下詔褒之贈都督同知廕一子世襲指揮僉事予祭六壇諡曰忠壯建祠皂林額曰褒忠命有司以時饗焉夫公以身殉敵視聞命誓語如左秀然璽書煌煌光賁泉臺延世之賞與國同久嗚呼公爲不死矣公宗氏諱禮字周道別號清渠其先蘇之常熟人國初有阿佛公者從軍北征隸於燕已卯隨 成祖征討鄭村壩陣亡以弟成補授總旗白

溝河有功授應天衛世襲副千戶成生鑑鑑生浩浩生椿卽公考也妣韓氏以公子彭年貴考贈都督僉事妣贈夫人公中嘉靖己丑武舉由祖職加二級署指揮僉事歷本衛軍政大寧都司北直民兵叅將神機營佐擊歲積勞動因以佐擊奉 命禦倭配石氏以子彭年貴贈一品太夫人生子二長孟言弱冠隨征柘林有功授祖職副千戶任至京營巡捕叅將次卽彭年廕指揮僉事中萬曆庚辰武舉有文武才自僉衛事至南京前軍都督府都督僉事以三十二年恩詔贈公榮祿大夫公之未生厥考艱子虔禱於神

正德庚午元日夢梓童帝君引一金甲神呼其名曰
以爲汝子初五日生公迄丙辰率時年四十有七語
云其生也有自殆公謂耶沒既久都督公來留都與
余晤語間及世德乞余文爲傳余念公精忠大節載
在實錄合于史大書特書例故詮次其事俾後之人
得攷鏡焉若乃生平孝友之行暨子孫婚娶之系則
家乘備紀之不具論

左君弼傳

黃金

左君弼廬州人元季壬辰羣雄倡亂君弼黨於彭祖
聚衆數千未幾彭祖敗君弼獨據廬州太祖遣將征
之不克癸卯三月僞吳將呂珍引兵寇安豐君弼助
之 上怒帥諸將擊珍敗走遂攻廬州圍之二閱月
城將下適陳友諒寇洪都急 上命解圍援洪都友
諒旣滅復攻廬州君弼窮蹙棄城走汴梁元將李克
彛使守陳州吳元年二月 上遣使陳何以書諭君
弼曰曩者兵連禍結非一人之失予勞師暑月與足
下從事足下乃舍其親而奔異國是皆輕信羣下之

言以至於此雖悔何及今足下奉異國之命禦彼邊疆與予接壤君欲獻計帥師侵境其中輕重自可量也且予之國乃足下父母之國合肥之城乃足下丘隴桑梓之鄉寧不思乎天下兵興豪傑並起豈惟乘時以就功名亦欲保全父母妻子於亂世足下以身爲質而求安於人旣已失策復使垂白之母糟糠之

分處各天一方朝思暮望以日爲歲足下縱

不以妻子爲念何忍忘情於老親哉功名富貴可以再圖生身之親不可再得足下能留意於是幡然而來予當盡棄前非仍復待以故舊則足下於天理人

心舉無不順矣君弼得書猶豫不能決後乃歸其母於陳州君弼感泣洪武元年王師平山東西指汴洛君弼納款降 上命爲廣西衛指揮僉事君弼自效從征克捷二年冬十月左江上思州蠻賊黃英傑聚衆萬餘寇鬱林州知州趙鑑同知王彬集民兵拒守賊攻圍半月不下廣西海北等衛官軍來援賊夜遁追至上思州境破之賊走還仍聚黨不解事聞 上命君弼爲副總兵討捕英傑與其弟英覽逃之十萬山七洞口君弼追及之英傑陣死英覽就俘餘撫安之自是兩江撞酋膽落矣四年春又以平溪洞蠻獠

虞衡錄 卷之二十一
有功賜綺帛二十疋

浙江都指揮僉事余斌傳

浙江都指揮僉事余斌直隸廬州府合肥縣人前浙江都指揮同知成之子年弱冠襲職爲處州衛指揮使戎務之暇留心經史延禮文士商確政事宣德五年調除定海衛自建義學延師儒令官家軍民子弟願學者咸肄業焉公暇躬詣考閱而激勵之務期有成以廉自持自撰公勤廉謹四銘書於廳事以自勵城南海口有大浹渡常覆舟溺人自撰文祭其神後遂無患六年仍調處州衛捕盜有功七年陞浙江都指揮僉事九年冬以疾卒年裁三十有二衆咸惜之

都指揮僉事陳公儀墓志銘

王直

公諱儀字叔度姓陳氏廬州合肥人故奉天翊運推誠宣力武臣特進榮祿大夫柱國平江伯追封平江侯諡忠襄諱宣之子也母夫人湯氏曾祖諱重一不仕祖諱聞官至成都右衛指揮同知以忠襄功皆贈榮祿大夫柱國平江伯妣皆贈夫人公自少端重謙和無綺紈之習好文章喜韜畧務窮其所至欲以自立於世當在當時論勲臣子弟有文武才具者必稱公永樂中宣宗皇帝爲皇太孫詔選良家子入侍公與焉上雅知其才特見親任有所顧問必盡誠

以對漢王蓄異謀公亦數言其姦狀 上臨御之初
果反凡其所言皆驗及事定以俘獲賜羣臣公得與
侯伯等益異恩也車駕巡邊出喜峯口公以驍勇選
在前適虜寇犯邊多所殺獲其後屢出巡邊公皆扈
從有勞績 今上嗣位求賢將用之成國公朱勇等
交薦公詔大臣試所業公言出奇制勝之道皆傳古
兵法及觀其騎射從容上馬引弓連發連中諸軍皆
大呼稱快同就試者皆自以爲不及遂擢爲勲衛日
帶刀侍從益以忠謹見稱瓦剌使來朝貢將歸豐城
侯李賢受命率兵送之言於 上曰今兵遠出慮或
有緩急願得勲衛陳儀者偕往可計事 上卽命與
之俱出塞二千餘里而還虜寇朵兒只伯擾西鄙公
上言請於寧夏甘肅簡精銳俟春暖俱發諸道並進
且先約瓦剌相犄角殘虜破敗之餘必就擒戮此萬
全計也 上然之正統五年麓川叛 上命定西伯
蔣公貴兵部尚書王公驥往討之公亦在行明年抵
其境蒲羅諸蠻作亂道梗不通公率衆直搗巢穴擒
其首惡殺數十百人諸蠻遁走師遂進拓降鎮康州
陶子孟刀門棒殺敗賊黨刀賴燕刀門顛等功居最趾
錦衣衛指揮同知其冬攻克曼邦永怕孟雷諸寨斬

二千餘級又領軍獨進抵南甸所向摧靡駐營馬鞍山下爲大軍後援遂以成功師還永昌蔣公王公命爲文勒諸石以彰 聖德還朝論功陞指揮使賞賚甚厚明年復往征師踰貢章功多陞都指揮僉事留守雲南積糧治兵爲後圖而公乃以疾終正統乙丑四月二十八日也生於洪武甲戌四月初九日享年五十二櫬之還也葬應天府江寧縣大山之原祔於先塋之次

都指揮僉事江公墓碑

吳寬

英宗睿皇帝在位方十四年海內富庶號稱極治獨北虜屢犯邊爲鼠竊之計 上思所以攘却之者乃下詔躬率六師往征師行失地利一時將校奮勇爭護乘輿而山西等處署都指揮僉事江公與其弟子四人同日死之時正統己巳八月十六日也公諱洪字朝宗其先廬之合肥人祖浩從 高皇帝起兵取天下累功至明威將軍太原左衛指揮僉事子孫世襲并得贈其父大海如其官旣沒子澧嗣而公則澧之子也公在太原旣以才勇知名宣德末選總京營

左翼久之陞署都指揮僉事仍守山西旣而從駕北
巡遂死於難公旣死朝廷卽命其子湧嗣職所以慰
公於身後者甚至公爲人偉軀幹沉毅有謀御下紀
律嚴整而推心任人能與士卒同甘苦蓋有古名將
之風尤善騎射輒命中流輩莫與比者性素儉約食
饌稍盛卽撤去而奉母劉氏必極其滋味母疾更割
股肉作糜進之疾獲愈人以其難其配陳氏贈都指
揮僉事實之女寡居能以禮自守教子湧有法湧亦
有將才嘗從征老軍營功多實授都指揮僉事署都
指揮使事以其官復贈其父若祖而贈祖母淑人封
母太淑人於是湧痛念其父嘗憤然有滅虜之志旣
奉公遺衣冠葬於先塋求予表於墓嗚呼 睿皇帝
之出所以爲宗社稷慮至矣蓋有周張皇六師之遺
意而非後世之爲游田者故當時死於難者多公之
事若同於人不足書獨惜平日號士大夫者棄君父
生還以取富貴有媿於王孫賈之母者不少矣公之
事不書可乎夫死者衆所難生者衆所易能爲其所
難而不爲其所易公之所以可取者在是而予爲之
表者豈惟慰湧之孝思哉亦惟媿乎若人焉爾

山東都指揮僉事贈武靖伯趙公本神道碑

彭時

今上皇帝嗣大歷服董正治官文臣武將各廸有功
而武將再征再克勲名播於中外無間蓋莫踰於武
靖侯趙輔者成化紀元之歲侯以都督受命帥師征
廣西大藤峽賊直擣其巢砦平之明年凱還朝廷厚
錫爵賞追封其父都帥公以上三代俱武靖伯母沈
氏爲太夫人又明年征東夷平其地捷報奏至而太
夫人棄世矣侯班師入覲旣卽執喪如禮將奉太夫
人之柩還彞鳳陽先塋乃述公夫人德善并家世屬

子文之刻石神道以昭示無窮公諱本字宗立姓趙氏世爲鳳陽人曾祖仁追封天水郡侯妣李氏追封天水郡夫人生六子曰均祥曰德勝曰鑑曰端曰某曰裕均祥與某俱蚤卒餘皆忠義才武奮身從高皇帝定天下德勝功最多官至懷遠大將軍僉江南等處行樞密院事拒僞漢陳友諒中流矢卒於南昌贈開國輔運推誠宣力武臣特進榮祿大夫柱國同知大都督府事梁國公諡武桓配享廟庭鑑官至弘衛指揮僉事端沉鷲剛果屢從征伐積戰多功歷陞福建興化衛指揮僉事居六年致仕以其子麟代職逾年復召拜鎮國將軍廣東都指揮同知後赴召入京賜賚還鄉卒裕興化衛正千戶端卽公之祖麟其父也並追封武靖伯祖妣劉氏妣曹氏李氏俱夫人公生於父葬之日賴母氏訓育以成旣長襲任直隸邳州衛指揮使卽督屬造海舟創新聞運神木以營宮殿才能卓卓著稱其於戎事尤爲練習凡從征沙漠者四靖內難者一俱以功獲褒賞久之用薦陞山東都指揮僉事領兵更番衛京師撫馭有方得士卒心尋命回治司事歲甲子山東旱饑戶曹奏准停支屯田卒月糧公曰支尚食不給不支則轉乎溝壑

必矣仍發廩放支僚吏執不可公曰有罪在我因以聞於朝卒如請賴全活者甚衆未幾以疾卒於官公爲人器量淵洪風采凝峻忠孝出乎天性以父不逮養事母極其誠居喪哀毀踰禮蒞官行政寬猛得宜處僚友和而王待僕從嚴而恕馭衆臨敵善謀而有勇公餘手不釋卷雖處軍旅亦然故於義利之分古人成敗之迹知之甚習而見諸行事率有可稱其教子不專於武藝必欲其通文學恒敬禮賢士俾知所嚮慕焉尤好施予親戚故舊有婚喪不能舉者輒捐貲助成之不少有德色其仁厚又如此享年五十四

遼東副總兵韓公斌神道碑

費宏

公諱斌字廷用姓韓氏由遼東寧遠衛指揮使屢用薦爲將守邊其在遼陽最久功最多今上二年公老而卒且葬幾十年矣遼陽人思之願公廟食其土詔可之額曰褒功都司官歲以春秋謁祭而屬予銘之公少孤年十六襲職蒞其衛事已若素練焉者嘗禦虜小團山能突陣馘其一酋以敗之天順初陞遼東都司都指揮僉事備禦寧遠虜復入小團戕將領官軍陷焉公馳赴手刃數賊圍遂解時義州屢失事總兵官成山伯王琮被勅責恐甚公請當先自効琮

以五百人屬公拒賊遇之於八塔兒賊衆四千圍我
闕其一面或幸焉公曰是將誤我不可忽也令營中
聯馬死鬪而出生擒一人斬首十三級獲馬五百捷
聞受綵段白金之賞尋奉勅守備義州協贊懷柔伯
施聚繁堡爲耕牧護坐寧遠誤事貶二秩巡撫都御
史滕昭巡按御史常振刑部主事丘霽惜其才交章
薦之禮送至京命署都指揮僉事充叅將征四川未
行捷至留京營督練尋充左叅將分守延綏西路時
北虜毛里孩擁衆十餘萬入定邊營公率五千騎伺
其歸擊之環縣擒一人斬首六十七級比收兵虜衆
猝至圍之數重約日出將蹂躪焉謀以告公度衆寡
不敵難久支出不可緩今我軍悉衣白以自別或謂
東南圍薄可出也公曰若虜將弱我而乘之矣乃向
虜衆奮呼而出有所斬獲公戒勿顧北出猶存七級
焉已而虜復入花馬池有衆三萬公度其難以戰勝
列陣城下出精兵三千陣車前賊知有備不敢近成
化三年建州賊數擾邊都御史李秉薦公武畧出衆
深知夷情勅改充遊擊將軍馳驛還遼領右哨從出
清河抵其巢斬首二百餘級俘男婦一百七十餘口
論功實授都指揮僉事以遊擊分守遼陽諸地明年

改充副總兵分守開原兼提督遼陽鎮巡諸官以爲
遼陽東南境與建州接守將非專任弗可請復遼陽
公與衆籌必堡兵而後能守親歷緣邊相賊所出沒
處創東州馬跟單清河驪場靉陽及鳳凰鎮夷草河
湯站等堡密烽堠增戍卒自撫順迄于鴨綠南北幾
千里聲勢聯絡居民因得墾灌莽田之屯利日廣而
虜深入之謀殺矣九年賊屢犯廣寧總兵官歐信會
公出義州直抵興中斬首六十二級論功陞署都指
叻知廷臣會推天下武臣可大將者三而公居一

晉人清河堡匿深谷中以數騎薄城挑戰將佐

爭欲擊之公曰此解也勿貪已而伏果起公乃背而
陣番休更戰賊旣遁復出驪河十岔口等處搗其巢
斬首百餘賊大舉寇靉陽而還也邀其歸路值淫雨
連日令士卒下馬徒行多怨者公曰馬疲則遇賊不
可用矣我豈欲勞人乎至將在峪部分將士舉號火
縱騎追奔馬有餘力遂斬六十三級公紀律嚴明下
莫敢犯頰中流矢能權詞以安衆心部卒有被矢中
目者亦能堅立不移拔鏃還射倉猝遇敵必謀而後
戰緩急合宜前後八九年屢與虜鬪未嘗敗衄爲同
事忌功者所中坐累復貶三秩知者寃之十五年撫

寧侯朱永等受命征建州公同總兵官侯謙復爲右
哨出鴉鶻關抵泊珠江斬首一百五十級俘男婦三
百八十九口虜酋有宋管只八者據山險欲夜劫公
營公令譯大呼曰韓馬法在此汝尚欲爲偷乎馬法
者虜所謂大人也賊衆願一見公公免胄示之皆棄
弓矢拜馬前請降軍遂還公度暮至黑松林賊必有
後邀者約謙軍其地以待之而謙徑先歸公至黑松
林賊果突出公急令立營一麾而定賊不能擾其料
敵應變類如此撫寧卽軍前奉欽給勘合陞公指揮
使捷奏上以公當一面復陞都指揮僉事明年北虜

侵開原而建賊復擾遼陽時公遭讒淹繫 上素知
公薄其罪釋而用之俾職任皆仍其舊且命亟行北
虜聞公至卽遁去十七年公乃詣撫順關招建賊小
花禿等以恩威諭之皆叩頭誓無再犯公知虜情多
詐嚴兵讎塲等堡以備之累以擒斬功受賞二十三
年追勦朶顏虜寇至半邊山獲原掠人畜而還 上
念公久勞特賜蟒衣一襲大理寺丞李介通政使田
景暘先後各薦公可主將廷論多歸之者而公浩然
不可留矣弘治二年公確辭至再遂老焉於時年甫
六十日置酒會親賓以爲樂時政物評未嘗掛口後

十有一年得年七十有二而卒公生長邊陲身長七尺有咫膂力過人精技射多智畧善以寡擊衆然不恃已長每戰必參衆謀而用之與士卒同甘若嘗雪夜追賊道卧以伺禁毋爇火一軍未食不輒先稚童儒生遇暇必延致誦說史傳故武功之立遂爲東陞世將有以也夫

陝西都司指揮僉事張公鵬霄行狀 王維楨

公諱鵬霄字圖南葵軒其號也上世直隸揚州府江都縣人曾大父英自瓜州渡江從 高皇帝取天下

庚申事定授指揮僉事世襲居六年 上忽詔英曰

爾隨朕起兵歲久勞多當封之爲侯英辭曰臣年老子孫薄福卽指揮足矣乞勿授 上賢之賜緋袍金

帶留侍京朝英傳秤秤初慶陽衛尋改西安後衛奉高皇帝命平雲南會冒癘疾作 上賜佩刀及家

人二戶慰之夫秤者葵軒公之大父也秤有子二人曰煥曰敏 文皇帝興詔煥隨侍煥無嗣敏得蔭其

官敏稱長者有器度是爲公父配周

以天順癸未

閏七月八日生公公脩軀通臂豐頤疎髯面如紫玉
目若朗星正視不見耳聲吐如鍾尤精騎射壯膂力
年十五襲官初將兵守寧夏已改守榆林已推衛僉
書已又陟掌衛事並能舉職效才一時寮佐咸推伏
莫及公由是有名 敬皇帝時北虜擁衆入寇大將
武安侯檄公應之公率騎兵二百遇敵滿受堡公曰
衆寡弗當也殊死而已令諸軍下馬馬盡入堡步戰
以日公督擊愈厲忽一虜朱甲青錐揮刃突來公率
士許朱三直前斬之朱甲青錐者蓋酋長云虜懼

遁我軍無傷事聞 天子壯之賜白金綵幣若干是
時他將兵孔壩溝者全軍皆沒坐免者衆人以是咸
服公勇而公有名少傅遂庵楊公者 毅皇帝時來
總制三邊事徵公幕下咨兵畧建圖畫計山川夷險
之形暨奇正分合之勢炯炯在目楊覽而奇之太息
曰大將材也欲大用不果後環慶地方弗靖有才總
制者知公疏公守備環慶陞署都指揮僉事至卽懸
賞募兵招商實廩斥堠繕飾城浚隍又奏歲增銀布
時犒士卒環人安之寧寘鏞亂諸路兵會靈州公謀
諸將曰賊據城不出黃河伊邇可引灌使下脫南渡

河患不可測矣於是令善渡者若干人夜奪河船盡使不得南賊聞船奪渡不克乃內自相殺公因攻之約諸將協應賊遂平事聞 天子降勅褒諭賜白金若干兩及紅金虎豹衣二襲陞都指揮同知公以署職加級辭不受居無何擢掌陝西都司事都司專故閣相踵莫之或振公憤然曰不振不立於是刷姦剔蠹著令布條咸斬有實軍吏懼縮無敢犯都司稱治久之蜀中盜起流擾漢沔湘洛間橫不可撲或有薦都司者而大司馬辛菴彭公亦檄公督三省十九路兵將討賊公卽督三省十九路兵將討之渠魁廖

麻子喻老人相繼授首俘馘以萬計公亦親斬六級其時論功第一有王給事者來紀功諸將謂紀功率有門入獨公入紀功中道王銜之乃獨掩公功弗上又分六級三陣同事者皆晉秩公止得賜白金及金衣二襲論者憾之又平關中盜斬獲千二百有奇又平洛南盜洛南盜負山孫副使難其剿向公念曰此無漢南鵠兒故事耶公哂曰未也可二十日擒比捷才十九日孫大服又平石門山回賊擒其首田迪遂盡收餘黨歸屬冬雪沒徑馬跌傷足公以是不出居數年今 天子興復起遂菴公總邊事公以楊雅知

我再出董旅期大得志於時楊壯之嘆曰孰謂廉將
軍老尚可用也令代巡諸邊乃卽疏公掌寧夏都司
事不報公曰今之仕宦者余知之矣不蹊徑率貶折
爾予終不能蹊徑貶折宦而媿于志楊公去遂杜門
謝事後中丞王公御史楊公王公連疏薦之竟不出
公才氣卓犖屢著勞伐人謂三錫五等之階超足可
至卽公亦自謂非俛俛人下也乃顧連蹇阨塞不獲
大致顯融豈李廣不侯數信奇耶抑時值嚮吹而公
操絃邪嗟哉公之得謝他日惟課園觀書絕口世故
歲時家廟展祭畢坐堂上令兒孫及家衆羅拜堂下

訓以內政甚肅生平不疾卒日猶三飯如常得年七
十有九先公守環時夢一老人皓首龐眉兩手捧紅
羅餽公且曰與公約之得八十尺未少不足人咸謂
公壽徵由今觀之信有數邪公慷慨峻爽絕機械論
事可否面裁琅琅傾聽好稽古昔說先王奧言遂旨
超悟自得卽章縫之士猶或後焉余同年渭南有劉
子文甫臨潼有任子伯玉二人者曩游長安與安世
交因獲見公爲余道之如此而安世又稱公爲指揮
總中軍時有太監劉雲者鎮守陝西肆誅求脅公爲
附公面折其非法數事執不從劉怒令無籍毀其宅

又僉書都司時能立判冤訟當道有滯獄皆以委之
無弗得其情者此豈非豪亢自負敏達不局者哉

王邦直傳

朱睦㮮

王邦直字國寧磁州人也父潺府谷知縣邦直生而
駢脇有神人稱王千斤云弱冠補州學生業已食廩
矣而非所好也乃學騎射窮韜畧有求試請纓頸繫
單于之志日擐甲令左右奉弓刀侍其父見而異之
人之潺自府谷遣歸遇虜于道發一矢不中中石石
爲之泐虜取矢視如扛駭焉遂不敢近嘉靖二十一
年邊警頗急詔舉才勇於是兵科都給事中戴夢桂
薦邦直於朝命詣大同贊義總督侍郎翁萬達與語
甚驩乃延入幕府以國士遇之解衣授食分坐談邊

邦直亦願以肝膽相歸而益以義氣自負也再踰年
謀報虜將入寇萬達使邦直同叅將張鳳率義兵五
百人出塞外覘視抵鵝鴿峪窺山上賊數十騎往來
邦直蹙而擊之無孑遺者復見山下賊百餘奔焉邦
直與鳳謀可悉取殲之從者曰千斤將軍功奇矣可
勿逞竟飛騎以往踰谷口數里忽至大陸溝中伏兵
約三萬餘騎列兩大翼而陣邦直激衆奮勇以矢石
急擊而身自引弓射殺賊首賊憤合圍七重戰七日
夜邦直斬虜千餘級會天雨雪矢食俱盡邦直潰圍
而出檢義兵從者惟王國順一人耳邦直嘆曰吾與

汝等本欲立功沙漠以報主恩不意衆寡不敵損亡
殆盡且鳳旣亡而吾獨存恥也異日何顏面以見軍
門邪遂策馬復入賊營力竭被害虜固壯邦直環其
尸相視嚙指翌日遂引退我軍與其尸而歸旣而有
自虜中還者云諸部落皆悲泣謂是役死傷不勝紀
自此虜數年不復敢犯亦懲之之故初邦直之死也
諸鎮士吏知與不知皆爲盡哀萬達親爲文祭之已
乃上疏請錄恤又擬張世忠故事乞謚表庸官爲立
祠與張鳳並祀而以李尚倫等八人附焉詔從之贈
邦直都指揮僉事建祠以祀仍廕子化熙爲潞安衛

正千戶世襲

論曰人臣有封疆之責統馭之任遭世多故或戮力戰禦或倡義嬰城不幸隳敗則委身而殞固其分也然非忠誠感發志意堅定豈不偷生而鼠竄矣良林抗聲罵賊慷慨就戮寧國奮勇殲虜視死如歸均之不失爲烈丈夫矣

福建等處都指揮使司掌司事署都指揮僉事

張君建節墓志銘

王世貞

余所友者張將軍元凱爲布衣飲竟歲甚懽一日悴其容而造余拜且請曰幸有以銘吾父昭毅君之墓問其卒十載所矣而猶未葬也已又其出其友王子百穀之狀曰是所待以不朽者二先生夫余而以元凱友也則銘之余而以百穀狀也則銘之然而昭毅君故先百穀而識余者也按狀君諱建節字子行別號咸虛其先鳳陽五河人六世祖得從高皇帝起義爲徐州衛千戶有二子長祥襲而遷陝西慶陽衛

指揮同知次真從 文皇帝下金陵以宿衛芟脊授
徐州衛指揮使調浙江臨山衛遂爲其司都指揮屢
遷石軍都督同知填浙如故有子智以病廢孫英襲
調蘇州衛自是兩家兄弟俱重於秦吳間有世官而
其居吳者尤著英亡子弟葵襲葵生叙叙生瑀爲君
父瑀有文武才握衛符者垂三十年而屬世承平弗
獲以功名自顯見君生七歲而喪母顧淑人表毀如
成人蔣淑人來稱母謂君能子矣是時張氏以俠聞
江南甲第樓觀假山池前堂羅鍾鼓立出旂羅綺曳
地出從平頭奴駿馬而君於其間獨布素自喜又日

夜習讀經史爲書生業父瑀內奇之謾曰家世材官
介士不於三尺取封業而至齷齪鉛塹爲君跪謝曰
將相不偏廢也且鉛塹三尺所受使父珍語屈而御
史視學者已試君高等補郡諸生自是試輒傾其諸
生以至有旣廩而其於應天凡三試輒不利最後父
珍卒當襲君請於御史得如諸生制終喪而襲御史
善之後遂爲指揮使當復應武舉試應試者謂所射
策論難毋若君何卽君射亦無若吾屬何也已君騎
而馳射鵠耦射又鵠乃大驚嘆遂爲第一人君凡三
試而兩爲第一其最後以策太奇忤御史猶第二而

至部試輒數奇不第如諸生時然御史天民薦之已
御史魏復薦之後與都御史黯合薦之御史洛復薦
之他御史先後尉薦至再三俱報聞而君之爲指揮
也蓋視衛符如珍時嘉興所者故衛屬也其舍人兒
張生富而入貲爲衛指揮欲列坐視事君怒曰卽不
肖從諸將軍其先皆自汗馬得之何至媚賈人骨哉
顧左右移張坐勿設張大媿夜行金三百爲壽公指
其門口此非入貨所也則以緹帥陸太保炳書來解
君弗啟封曰吾賤不識陸公也衛故與郡鈞禮它指
揮卽不敢以鈞禮請而君獨行之自如郡守丞初亦

不自得徐察君衛事治而所接談議斷斷見風采至
與之搯風雅觀酒德久而非君無歡也時暴有倭警
都御史蔡公檄諸將軍樓船出海錯愕不敢發君解
印綬佩其副曰吾難吾綬哉促韎帕韋附注殼而從
少年蒼頭數十人前薄賊賊爲之披靡矣而遷南京
總漕行都指揮事以去君旣持廉無所射狗而能察
用其下卽偏裨少不法袒而受杖惴惴受約束以故
其漕績獨稱諸帥冠踰年遂爲真而僉鄖陽都司事
而章中丞煥者君故人熟知君才數令行部上便宜
諸非軍事而疑者亦輒以屬君棗陽大俠鄭負險數

壁亡命匿稅田百千頃官數捕不得君單騎入其巢
縛之出衆睥睨莫敢動遂置鄭法而沒其田中丞上
書績遷長福建都司亡幾而倭薄省城大震諸守帥
皇恐不暇食飲君與其舍人雅歌投壺自如撫臣者
失其名司而難之而君所治虎落躡石勁弩長戟守
具精甚而所將士又選賊望見君幟卽不敢壁而移
壁他所旣賊退撫臣乃更媿恨君以三千金檄君治
兵甲人或謂君名爲兵甲耳君誠能捐其半爲撫公
壽必德君而其半尚可橐也公謝不可日夜趣治兵
甲咸犀利先期報撫臣乃大失望而以君摻兵匿籍

六千人更用爲擾而劾之君坐罷君乃大喜曰今
而後庶幾還吾書生哉卽日歸解橐中裝直可二百
金悉以推其孽弟建寅而躬理泉石花木之業與故
吏部郎毅祥徵君章憲使美中輩課詩酒以自娛識
者謂大司馬尺一旦夕下君而君以羸疾逝矣君逝
以嘉靖丙寅距其生正德壬申春秋五十有四所著
有毛詩問難四卷北游錄二卷軍政條約四卷戰守
說各一卷問漕集二卷續漕志二卷楚游稿一卷守
閩說一卷樂志園集四卷藏於家

庸雅堂

卷之二十一

五十六



